

**CORONA
CAPITIS**

**Ex auro optimo Virtutum &
Meritorum Aviti ZIELINSICIO-**

**RVM Sanguinis
ELABORATA,**

&

**ILLUSTRISSIMO, CELSISSIMO & REVE-
RENDISSIMO DOMINO,**

**D. CONSTANTINO
JOSEPHO**

de Goscifka

ZIELINSKI,

Archiepiscopo Leopoliensi,

**In Solenni ingressu ad Leopoliensem Ar-
chicathedram**

à Loviciensī Scholarum Piarum Collegio

CONSECRATA

Anno Jubilæi

M 7 0 0.

VARSAVIÆ,

Typis Collegij Scholarum Piarum.

In Stemma
Illustrissimi, Celsissimi ac Reverendissimi
 ARCHIPRÆSVLIS.



*Inter Sarmaticis radiantia Stemmata ceris,
 Hæc Caput & Dextrâm, gestat Avita Domus.
 Omnis cedit honos Capiti, Regumq; Corona
 Cedit, ut immensum cingere doctâ Caput.
 Ex hoc principium petimus, Tu proxima laudes
 A Capite exorsas, Dextera scribe Tuo.*



Ad
Illustrissimum, Celsissimum & Reverendissimum
ARCHIPRÆSVLEM
ODE DEDICATORIA.

R*Egum coronas & diademata
Ad purpuratas addimus Insulas,
Insigne Regnorum trophæum,
Præsuleæ sociamus Aræ.*

*Sic rarò solus scandit in aureas
Honor curules; agmina grandibus
Stipata gestis, mille secum,
Per populos trahit apprecantes.*

*Commune vulgi quæ supereminet
Encomiorum pondus, & arduos
Virtus decores, comparatas
Eloquio levior laudes*

*Contemnit: Auro tænia Principum
Intexta, dignum sic decuit Caput
Regale munus consecratas,
Sic decuit redimire Vittas.*

*Sors prominendi nulla decentior,
Non corrogatâ luce serenius,*

*Fulgere gestorum: paternis
Nec pretium meritis pacisci.
Avita frustra Stemmata fulgurant
Appensa nigris densius atrijs,
Nos nostra commendant peractæ
Quæ gerimus monumenta famæ.
Præconiatrice pagina protulit
Hæc quæ vetustis plena nitoribus,
E sanguinis desumpta Magni
In brevius redigit Corona.
Non fabulosis fascibus indigus
Vinciris isto culmine celsius,
Quod è Tuorum penna velox
Accumulat solio laborum.
Quantum secundo tolleris omine,
Inter bicollis munia purpuræ,
Quantum Polonas invidendus
Præsulibus remeas per urbes.
Ascende faustus crebrius inclytas
Ascende Regni non humilis bases,
Tendas per immensas honoris,
Per Procèrum sinuosus Arces.*

Ita vovet

**ILLVSTRISSIMO ac CELSIS-
SIMO NOMINI TVO**

Devotissimum

Colleg. Lovic. Scholar. Piar.



PANEGYRICUS.

AD Metropolitanū
culmen bonis avibus co-
ronatum verticem Ar-
chipræsuleâ mitrâ im-
portans Cathedræ secundo votorum
nostrorum applausu Tuam conco-
mitante felicitatem inauguraris for-
tunatus ARCHIPRÆSVL IL-
LVSTRISIME. Videntur hîc evi-
scerare se honori Tuo Auspices Dij,
quando altâ pace cum Oriente fa-
ctâ; sub tempus Jubilæi magni, quo
pleno sinu Mater Ecclesia Spiritua-
les dispensat gratias; sub AVGV-
STO SECVNDO, Rege Poloniarū
Serenissimo, nihil non augusti, nihil
non secundi suo etymo portenden-
te, Regalem ubiqve gloriam & tre-
mendum hostibus nomen circum-
ferente; plaudentibus omnium de-
A fide-

siderijs; tripudiantibus votis; exili.
entibus in acclamationem affectib⁹;
irrugiente felicitati Leone Ruffiæ;
ad infulati muneris eminentiam,
per intratum vestigijs muricem
CONSTANTINO Successor invi-
taris **CONSTANTINVS**. Latis
passibus, obambulante Poloniam
pace, ingrederis culmen Archipræ-
fuleum, nè triumphali Nomini sub
crucis labaro desit auspiciū, ma-
nubiasq; honoris videatur denegare
fortuna, quæ in Annulo Pontificio
suam Tibi, **ARCHIPRÆSVL IL-
LVSTRISIME**, inscripsit æterni-
tatem, vel quia semper ea locutus
es & opere complevisti, quæ ad
pacem sunt, ideò tranquilla pacis
tempora sacris Tuis fascibus meru-
isti; Anno gratiæ, ut documento
sit, quibus Te dignum gratijs per
indefessos labores & merita in Ec-
clesiam effecisti, cui eodem tem-
pore porta patet ad gradus purpu-
reos, quo recluditur per solennem
in *Vaticano* cerimoniam; Sub **AV-
GVSTO REGE**, ut in successionem

temporis nostri serò ventura posteritas pretium à magnitudine metiatur, quantus esse debebas meritorum amplitudine, sub tanti Nominis Poloniarum Moderatore, cuius etymon solum cogitando satis habebit æternitas. Et huic Tuæ gratamur fortunæ, quia cum ejusmodi spe publica dignis infulato honori Tuo assistit augurijs, fatemur tamen, quòd nisi his prælusisset auspicijs Sacris Tuis fascibus, justo eam prosequeremur lamento, vocaremus utpotè ream honoris Tui ad tribunal doloris nostri, exprobraremus crimen, ulcisceremur exclusione è coetu Superum, si Tuæ jacturam gloriæ in multis hoc joculari Numen attentasset: nec enim nobis parva vindicta sufficeret, qui Tuis meritis Summa omnia, quæ Sæculorum ingrediantur admirationem deberi non ignoramus. Gigas honor sit necesse, parem cœlo staturam, æqualem Nereo amplitudinem assumant laudes, quæ parantur celebritati Tuæ; alias Pygmæa oratio non compareat, nisi

velit mereri cachinnum ridentis
mundi; vel intra oceanum merito-
rum Tuorum velut minutior gutta
absorberi. Ipsi nos præfidentius e-
loquentiæ studium vindice multa-
remus indignatione, si minùs con-
sultâ temeritate auderet Tuorum
majestatem Operum humili recen-
sere locutione, & non potiùs tur-
ritis verborum auxefibus ad usque
cœlum attollere, ultra Sydera ele-
vare conniteretur. Ideò hîc nullus
apex, qui nolit crescere Tuis laudi-
bus, nulla litera, quæ non ambiat
magnitudinem Tui, nulla syllaba,
quæ nexu literarum augere non de-
sideret Tuam gloriam. Si dictionum
pervestigas alacritatem ARCHI-
PRÆSVL ILLVSTRISIME,
quælibet cum exultatione respon-
debit, divino labio se velle dicere
Nomen Tuum, si commatum? nul-
lum erit, quod in columnam transi-
re non cupiat characteribus gloriæ
Tuæ exornatam; si inciforum? hæc
non partes laudum Tuarum, sed in-
tegras tomos & volumina desidera-
bunt;

bunt; si membrorum? non diffido,
quia viritim omnia ad panegyricam
integritatem aspirabunt; si rotun-
darum periodorum? hæc volent
Sphæram Orbis universi agere, ut
gyro perpetuo æternum Tibi vehant
& revehant Solem; deniq; oratio
tota nil nisi fastigiatum, celsum, æ-
ternum honori Tuo meditatur. Et
quamvis conscia suæ tenuitatis sit,
nec ignorat, quamlibet cogitationē
Tuam mereri annales, quodlibet
verbum Delphico par oraculo, di-
gnum esse Iliade, quemlibet actum,
totum pro pagina requirere coelū,
quia tamen vel parvo eloquio Tuas
proferre laudes ingens magnitudo
Panegyrici est, eas adstruimus, non
ignari, cumlatius Orbi constare
Nominum amplitudinem, si mini-
mis communicatur. Syderum Im-
perator Sol eò celebritate suæ lucis
nobilior, quia nullas despectat val-
les; mare magnum, quia minutio-
ribus rivulis se circumcingi patitur.
In Supremo Jove illud præcipuum
B est,

est, quòd thure placari se permit-
tat, cùm desit hecatombe,

Parvo coronat munere se Deus,

Plerumq; si quæ paupere dat manu

Dives voluntas, parva magnis

Sæpè animo placuère magno.

Tibijs canunt qui tubis nequeunt,
æquè tamen læta ad concentum
exigui fistri Deorū gloria, ac gran-
dioribus celebrata barbitis; æquè
dies serenus in primo ortu à Cygnis
luscinijsqve salutatus, quàm à rudi
avium permistarum plebe. Neq;

Tuæ quidquam detrahetur gloriæ
ARCHIPRÆSVL ILLVSTRISSI-
ME, si inter tot eruditorum Capi-
tum constituta exercitus exilis ora-
tio nostra aggreditur pumilione sty-
lo humanos cogitatus, transcenden-
tem Panegyricum purpurati hono-
ris Tui, non enim ideò cœlo con-
termini colles minores sunt, quia
eos parvi circumstant monticuli,
nec altæ cedri exindè aliquam pa-
tiuntur injuriam, quòd ad earum
mensuram, sive aliquando ulteriùs
proijciatur famularis umbra, proin-
de nec honor Tuus omni major Pa-

negy-

negyrico, si eum pusillus, & minutim per paginam sparsus, prosequatur labor atro sudore manantis calami. Eò magis eminebit, & ultra staturam nostram elevabit se, quò minutior dictionum quadrans asseritur in ejus laudes. Ita enim consultum nobis, ut qui magnitudinem Tuam attingere non valemus, admiremur saltè à longinquo patritij sanguinis dimanantem Oceano.

Et quidem à Capite nostræ totius admirationis fonte, Tui verò **ARCHIPRÆSVL ILLVSTRIS-**
ME decoris aviti fundamento ecclasiæ defixæ mentis incipim⁹. Quantum in hoc membrorum Principe posuit fortuna prodigium! meditantur futuræ ætates, attonita mirabuntur Sæcula, stupebit æternitas. Meditantur ætates, quos debebunt honores nascituris ex hac Familia Viris, à quibus postrema omnia principe membro in patritiū decus consignato removet parens fortuna successuum; mirabuntur

*Caput
Stemma Illu-
strissimi
Archiprae-
sulis.*

*Archiepi-
scopus Gne-
suenf. istius
Stemmat
unus, alter
nunc Leo-
poliensis.*

Sæcula, quia annis quingentis sexa-
ginta duobus à primis abstinuistis
purpuris, licèt ad eas capite genti-
litio præsignati estis; stupebit æ-
ternitas, unum tantùm istius Stem-
matis Gnesnenfi Cathedræ primati-
ali mitrâ, alterum nunc Leopoliensi
Archipræsuleâ **CONSTANTI-**
NVM ZIELINSKI præfuisse, cùm
tamen vestro Capiti omnium æta-
tum principatus, primiq; honores
debeantur. Nec immeritò: quid-
quid enim vel intra undantes Cly-
peos tempestatemq; Martis glorio-
sum fuit, vel sub tranquillo pacis
otio ad Regni integritatem opero-
sum Herculeo labore indiguit, vel
inter aurea liberæ vocis scrutinia
ad Senatum pertinuit, vel innocen-
tiæ defendendæ per obtentum gla-
dij à Curiali Themide commissum
Tribunalib⁹ lætam fecit justitiam,
vester interfuit labor, æstuabat in-
dustria, fatigabatur opera. Specta-
vit arduam, non tamen humeros
prægravantem palæstram hanc non
sine invidia nostra antecedentium

anno-

annorum oculus in *Gregorio Zielinski*
Palatino Plocensi, viro ætatum Phæ-
nice & verè Thaumaturgo, qui tot
fecit miracula, quot mira & stupen-
da succedentibus Sæculis arcano
confiliorū sensu antidota infirman-
ti sua inter mala Patriæ propinavit.
Spiraculum vitæ illud fuit, in quo
nemo non vivere sibi videbatur,
quod ille in publico confessu Pro-
cerum defatigatione pectoris per
longiora pneumata ad communem
Regni integritatem dirigebat. Age-
re animam nunquam debuit, qui in
tali obsequio Reipublicæ vitam e-
git. Verè Senator non à purpu-
ra, sed à gravi maturitate pruden-
tiæ: ita portavit muricem, ut nun-
quam erubesceret pro levitate sen-
tentiae: ita sedebat in Senatoria
sella, ut semper staret pro Patria.
Enituit sub SIGISMUNDO III.
hæc in commune bonum ejus pro-
clivitas, dum enim aliorum requi-
rerentur manus ad confirmationem
subscribendam Pactorum, ipse non
postremâ authoritate suum adjecit

*Gregorius
Zielinski
Palatinus
Plocensis,
manu &
consilio po-
tens.*

*Subscribit
se Confirma-
tioni Pacto-
rum sub Si-
gismundo
III. Rege
Poloniarū.*

characterem, ut haberet, quod æternâ lectione recitaret posteritas, disceretq; vel exinde amantem Patriæ Civem, quod non solum cor, sed & manus donârit illius paci, nunquam pro fortuna suorum ambitiosior, quàm ubi ipse & ferè totus impendendus erat. Stupenda liberalitas in libertate seipsum non habere, & sibi ipsi tunc deesse, cùm prodesse oportet omnibus. Communis tamen hæc sui profusio in *Zielinskijs*, qui non sibi, sed Patriæ vivunt, & tunc maximum sui lucrum existimant, quando nullam partem sui habent, quâ deserviant privato bono. Intravit hunc nunquam interituræ laudis syllabum *Valentinus Zielinski Castellanus Plocensis*, Avus Tuus ARCHIPRÆSVL ILLVSTRIS-
SIME, qui publicarum curarum sollicitudine quantum valuit, testatur zelus gravi sententiarum authoritate ponderosus in medio coetu Purpuratorum, aliorumque Procerum, dum generali scrutinio Patres Patriæ boni communis rem decer-

*Valentinus
Zielinski
Castellanus
Plocensis,
Avus Illu-
strissimi Ar-
chipræsulis.*

decernerent, consulerentq; meliori
fortunæ totius Regni. Sensit Peri-
clem discors & sano sensui refra-
ctaria contradicentium æmulatio,
cùm ille vehementior melioris vo-
ti assertor fervidioribus daret lin-
guam argumentis, & pænè voce ful-
mineâ attonaret aures. Plumbeam
grandinem in suum effusam caput
existimabat obfirmata in suo sensu
pervicacia, quoties hic verborum
jacula Catone torquebat eloquio, &
inter disertos rationum conflictus
stabat pro veritate inconcussus.
Tunc experta Polonia Martem &
Palladem armata Numina optimè
in *Valentino* convenire, dum & in
campo gloriosissimè belligerantem,
& in confessu Purpuratorum Civiũ
lingua bis acutâ rhomphæâ proter-
vos animorum sensus triumphantē,
gratulabundo metiretur obtutu. Vl-
tra superbam antiquitatis jactatio-
nem probavit Cæsarem ex utroq;,
cui & rutilans bellico usu chalybs
in barbarorum cervicibus crudo hi-
antem vulnere inscripsit gloriam, &

eruditus codex memorandis posteritati oraculis non trivialis sapientiae celeberrimam confecit historiam. Eousq; revolvimus non sine suavi mentis illecebra, quos in obtentum labantis Patriae hic alter Scipio torquebat enses; refricamus memoriae externo Sole calentes victorias, reducimus in chartam agones passus, revivimus heroicæ præmia fortitudinis, detractas hosti manubias, circumspicimus victrici calcaneo instrata Gelonorum cadavera, stagnantem sanguinem, refissas chalybe cicatrices; post redditam verò disturbijs militaribus pacem, ubi jam triumphali ferto cædibus exsatiatum Martem redimivit, admiramur in consulendo prudentiam, in zelando maturitatem, in persuadendo verborum robur, in defendendo modos, in obsequendo Regibus promptitudinem, in occurrendo rebus arduis, communibusq; incommodis sagacitatem. Recensent non tam prudentis liquore calami, quàm inter obsequia

Regni

Regni defluis ex ejus fronte sudo-
ribus ultra sinus laudationis exun-
dantes fasti, quam in utroq; foro
meruerat lauream *Valentinus*, quan-
tus manu & capite, quibus inter æ-
quales meritis, inter majores digni-
tate, & nisi ipse ad tantam augem
gloriæ pertigisset, vix ipsis annali-
bus crederemus. *Æmulati Fratrem*
Sigismundus & Nicolaus Zielinski quò
tantum vocabat gloria, & anteam-
bulo Prædecessorum honor impelle-
bat, eò non tantum pernícia vota,
sed cataphractos etiam expediebāt
labores. Merebantur his prodro-
mis ad summa pervenire culmina,
nisi eorum Nepotibus, in quibus
viverent diutiùs gloriosi, suas fortu-
na reservâisset gratias, quas brevi
cum fœnore primo *Joanni Zielinski*
Castellano Visnensi, Filio *Nicolai Zie-*
linski, tandem alijs per successionem
sanguinis compensavit. Amorem
videlicet parentum imitata, qui o-
mnem beatitudinem suis exoptant
filijs, & tunc vel maximè videntur
sibi felices, quando in suis eminent

*Sigismundo
& Nicola-
us, Fratres
Valentini
Zielinski
nati mino-
res.*

*Joannes
Zielinski
Castellanus
Visnensis.*

Successoribus. Implevit hic magnorum vota parentum unio, omne pretium è mari sanguinis congenitis adæquans talentis, quia se uno illorum perfecit numerum, qui singulari æstimatione digni, ad magnos fasces requiri poterant. Ostendit non ipsâ multitudine, sed etiam multis virtutibus magnas constare familias; si illud rectefactis attingunt, quod sufficit multis ad imitandum.

Infundit paginæ grata memoria, sed nec nos inviti locum dam⁹ inter Panegyricos *Zielinsciorum*

*Ludovicus
Zielinski
Castellanus
Sierpscens.
Capitaneus
Ciechano-
viensis, Pa-
ter Illustris-
simi Archi-
presulis.*

LVDOVICO ZIELINSKI CASTELLANO SIERPSCENSI, CAPITANEO CIECHANOVIENSI, Patri Tuo ARCHIPRÆSVL ILLVSTRISIME. Nullus hunc violentum expertus, proinde nec nostræ dictiones panegyricæ, quæ ultrò ambiunt, ejus aptari laudibus, ultrò se insinuant portando Nomi- ni. Grator nunquam ingenijs occupatio fuit, quam laborare ejus gloriæ, quæ non ab Avo pictisque Aboriginum simulacris, sed à con-

cate-

40
catenatis sibiq; mutuò succedenti-
bus constabat meritis. Findi capi-
ta multis necesse, ut effingant ali-
quid, & adoptivo laudis apparatu
indignis addant nominibus, ipse
genuinâ virtutum successione, ita
suas nobilitavit laudes, ut nihil o-
pus sit, à conceptu ingenij ad ejus
celebritatem addere, qui plus mul-
tò ludavit in obsequio Patriæ, quàm
doctæ sepiæ scriptorius potest pro-
fundere calamus. Si ejus capitis
fatigati sudoribus scribere vellemus
encomia, impleremus Orbis univer-
si Bibliothecas, occuparemus ejus
laudibus imprimendis typographi-
as, & nihil omnes mortales face-
rent, nisi legerent ejus laudes, vel
meditarentur actionum prodigia.
Si profuso barbarorum sanguine ef-
figiare characteres gloriæ nitere-
mur, chartarum priùs officinæ cum
suis deficerent operatoribus, quàm
de illo scribendi materies. In se u-
num heroum nomina transporta-
vit, qui illum vidit, Romani decus
Imperij vidit Pompejum, vidit pro

sua Troja dimicantem Hectorem, vidit pro sua Græcia luctantem Annibalem; qui illum audivit, redivivum audivit Tullium, Cecropio halantem favo audivit Cyneam, probavit sensu maturum Nestorem. Non laboravit desiderio, ut illa veteris eloquentiæ admiraretur prodigia, nam in eo totum fuit, quod non unius tantum hominis, sed omnium pænè mortalium expleret admirationem. In eo habuit, quod grandi suo emolumento perdisceret juvenis, æmularetur vir, imitaretur senex, laudaret civis, gratularetur Patria. Fuit enim religione Pompilius, amore Codrus, magnanimitate Scævola, militari dexteritate Cocles: in Divorum triclinijs sanctus, in Magistratibus rectus, in Tribunalibus justus, in aulis non dissolutus. Vultu affabilis, modestus oculo, benevolus corde, manu beneficus, morigerus consuetudine, gratiosus gestu, quem prudentia gravem, facundia suavem, ingenium probavit admirabilem. Quoties lo-

que-

quebatur, aures omnium possidebat, quoties agebat aliquid, univ-
forum imitatio vigilabat, quoties
meditabatur, arebant desideria, eò
avidius fruitura ejus Hymetto pru-
dentia, quò tardius in linguam di-
ctionum executio veniebat. Nihil
fecit, quod in suum non conserva-
ret depositum mater annorum æter-
nitas, ad perennitatem splendoris
in Successoribus duraturam, quam,
dum astra suis reflectent cursibus
orbem, ferò nascituri Nepotes ad
gloriam usurpabunt. Fatuos ignes
plurimorum actiones imitantur, qui
ad modicum tempus fulgent, &
dum volant pereunt, quia vel ad
privatum focum suam lucem nan-
ciscuntur, vel tantum ab optimis
Progenitoribus resplendescunt, *Lu-*
dovici Zielinscij rectefacta non ad
breve tempus illustria, quia vel ad
irati Martis nitrata incendia, vel ad
Serenissimas Regum majestates ar-
denti obsequio Reipublicæ calue-
runt. Inter mortuales favillas situ-
ari non possunt, quin in motum

quendam æternum expediantur; si enim unumquemq; sequuntur opera, quæ se authore fiunt, immortalī passu obambulare æternitatis gyrum non negabimus ea, quæ honesta initia, finem habent gloriosissimum. Ideò laurus assymbolum æternitati præmium ritu solenni Antiquitatis donabatur similibus, ut constaret perennare labores, qui lasso anhelitu ad vitam animati æternum vivere meruerunt. Fatigant quidem multorum vires fatigā, & alto præcordiorum suspirio quendam agonem generant luctantibus inter se visceribus, non tamē ita fatigant, ut non simul ad gloriæ perennitatem aspirare faciant, eamq; cogant impetrare sæpius geminato anhelitu. Si verò addant aliquati sudoris gemmas, & emendæ perennitati impendant, nullum reor illius esse pretium, quod venale non sit pro ejusmodi, non è salo, sed falso frontis defatigatæ succo prodeuntibus margaritis. Et hic ut plurimis sufficit ad obtinendam
nomin-

nominis perennitatem quæstus, ut-
potè non inglorius, *Vladislao Zielin-*
ski non suffecerat, quin propriij san- Vladislao
Zielinski
miles pro
Patria ma-
riur in ca-
stris.
guinis ab hoste pro Patria cæsus af-
funderet Rubiconem. Purpuris hunc
Illustrissimi genuère Parentes, pro-
inde nec ipsa mors eum esse volu-
it sine purpura. Tulit ostrum pro-
priij sanguinis gloriosissimum Libi-
tinæ munus, quia non sine gloria
bellicæ fortitudinis. Pulchrum hoc
moriendi genus medias inter laur⁹
triumphaliter præcinente buccino,
transilientem cadavera hostiū cœ-
lis donare animam, & ibi mortua-
lem edormire somnum, ubi nitratus
Mulciber æternum diem præliari-
bus accendit ignibus. Plerosq; in
tenebris supremi deliquij auferunt
manus Libitinæ, dum inter dome-
sticos lares in mollioribus culcitris
& pulvinaribus ignavū præsignant
agonem; jam verò sub Dio milita-
re caput cingente coronâ syderum
magnis heroibus mori permissum
est, ut sic ab ipso cœlo astrorum
quotidianis recalescente flammis,

ignes habeant triumphales; & quemadmodum suæ magnanimitatis metas nec terminum habuerunt, ita totius campi militaris amplitudinem in sepulchrale reconditoriū nanciscantur. Digni quibus æterno vere ultra superbæ antiquitatis votum victrices palmæ frondeant, quandoquidem non tantum falso frontis stillicidio, sed proprio quoque sanguine easdem ubertant. Sed quia non omnibus moriendi facultas pro vita Patriæ, distribuit variam inter *Zielinscios* benemerendi copiam in Regno Poloniæ prodiga dispensatrix gratiarum fortuna. His videlicet extra fines Regni, alijs post cruentas cum barbaris collisiones ad latus majestatum captandæ gloriæ uberem permisit licentiam. Quantus autem in unoquoque illorum impensæ à fortuna gratiæ usus fuit, patet liquidò in *Valentino Zielinski Castellano Plocensi, Joanne Dapifero itidem Plocensi, Adalberto, Sigismundo, & Martino Zielinscijs*, qui ut pretiosius aurum in corona-

to ver-

Quinque Zielinscijs subscribunt se electioni Vladislai IV.

to vertice VLADISLAI IV. Regis
Poloniæ rutilaret, electorali pon-
dus calculo, & suæ manûs subscri-
ptione addiderunt. Plurimum sibi
videbatur accessisse majestatis O-
ptimus ille Poloniarum Regnator,
dum à tot uni⁹ Domûs, tantorumq;
suffragio Civium, crescere suam di-
gnitatem vidit. Nec immeritò:
quò enim plures voto suo & affe-
ctu Regiam felicitatem comitantur,
eò major paludatis imperijs æsti-
matio, augustior tæniatæ gravita-
tis pompa. In auro etiam pauper
majestas proinde & omni exposita
subditorum injuriæ, si non habet
sequaces affectus, quorum cliente-
lâ dissidio cordium laborantes in
sui flectat reverentiam. Non est
opus fortunarum luce ab Indis Tar-
tessijsq; æstimatâ sublimiori trun-
co elevatos suggestus Principum fe-
renare, ut præ reverentia nictan-
tem vulgi submittant oculum, suf-
ficienti lumine radiabunt, si expor-
rectis in sudum frontibus assistant
Cives. Magna pars fortunæ Regū,

Joannes
Zielinski
Frater Il-
lustrissimi,
ultra vigin-
ti vices in
Comitijs
Nuntius.

multi amici : plurimum auctori-
tis coronæ in cuius ornamentum,
non tam Erithræi maris uniones,
quàm unitus in amore Principis sui
populus aggregatur. Scepbris fami-
liarem & singulare decus majesta-
tum hoc loco revereor *Joannem Zie-*
linski Gubernatorem Ciechanoviensem,
Fratrem Tuum ARCHIPRÆSVL
ILLVSTRISIME, qui non solùm
in nomine, sed in lingua etiam por-
tabat gratias. Ex *Helena Zawadzka*
Palatinide Parnaviensi genitus, do-
cumentum fecit, Castores & Pollu-
ces ex talibus nasci, ad quorum lu-
mina Reipublicæ navis optimè di-
rigatur. Ultrà viginti vices in Co-
mitijs Nuntius nullum habuit, qui
suæ electioni votum subtraheret,
quinimò apud omnes eos favores
consecutus est, quod universi de eo
eligendo certare debuerint, omnes
in dando suffragio priores esse vo-
luerint. Ille se rebatur felicem, qui
gratiosum Nomen ejus ante alios
pronuntiavit, alij nisi pronuntiâs-
sent, multum fortunæ suæ deesse

arbi-

arbitrarentur. Ex tanto votorum
atq; favorum conflictu ad generalia
Regni Comitia Ablegatus, ita suorū
servijt desiderijs, ut nihil residuum
fuerit, quod ab eo fieri desiderarēt,
se excepto, quem collatis desiderijs
universi ad primos expetebant ho-
nores, ut qui prior alijs in eorum
fuit affectibus, non esset ultimus in
honore. Ad publicum Regni Tribu-
nal deputatus Judex nunquam of-
fendit justitiam, ratus grande sacri-
legium profanare sacram Themidē,
vel peccare in eam, quæ virtutum
aliarum Dea est. A tinnitu æris,
auri, & argenti mortuæ signo justi-
tiæ maximè abhorrebat, nihil ma-
gis funestum judicans, quàm sepul-
chrum æquitatis. Augent sangui-
nem, sed non minùs Panegyricum
Stanislaus Zielinski Subdapifer Plocen-
sis, & Jacobus Vexillifer Dobrzynensis,
uterq; nexu germano Frater Tuus
uterinus ARCHIPRÆSVL ILLV-
STRISIME, quorum sola pronun-
tiare Nomina satis est ad gloriam
Oratorum. SuffICIENTER explevit &

*Ad Comitia
generalia
ablegatus.*

*Ad Tribu-
nal Depu-
tatus Judex*

*Stanislaus
Zielinski
Subdapifer
Plocensis, &
Jacobus
Vexillifer
Dobrzyne-
sis, Fratres
Illustrissimi.*

suæ laudis famem & facundæ munus eloquentiæ, qui unum *Subdapi-ferum* elocutus est; inter plausus & vota multorum triumphavit, qui *Vexilliferum* suo expressit caractere. Non est opus, quod diserto ore magnos proferat Scipiones, antiquatos Romanæ gloriæ portet in lingua Æmilios, inter laudes sui eloquij misceat Orbis & Urbium terrores Alexandros; facundi oris ingentem gloriam consecutus est, qui *Stanislaum* dixit: Pericleis fulminibus se fecit inclytum, qui *Jacobum* in ore habuit. Ipsa *Zielinsciorum* commemoratio ingens est Panegyricus. Nam ad eorum celebritatem nihil majus excogitari potest, quàm illi ipsi. Qui solum Nomen eorum protulit, simul protulit immortalium virtutum decora, protulit avitam & pænè hæreditariam eorum Domui fortitudinem, æstu gradivo calentes victorias, consenescentes protulit sub casside vires; dixit prudentiam publicis commendatâ successibus, rebus in arduis triumphan-

phantem industriam, solertem in
 summis Regni negotijs accuratio-
 nem; recensuit omnibus honorum
 titulis circumflua merita, ostendit
Ludovici Zielinski Thesaurarij Lom-
zensis, ex Teresia Brzosszonka, filia
Succamerarij Nurensis geniti, ad
 Tribunal Deputati vitijs formida-
 bile supercilium, virtutibus, & in-
 nocentiæ, renidens in vultu sudû;
 evulgavit simul & semel *Joannis,*
Jacobi & Ludovici Fratrum meritis-
 simum ternionem cum summo glo-
 riæ argumento in Comitijs legatio-
 ne functum: *Caroli, Adalberti, &*
Francisci Zielinsciorum Cataphractæ
 cohortis militum sævi inter flabra
 Bootæ omnibus coeli injurijs auge-
 scentes vires, præliares fortunas,
 repullulantes inter Cupressum bar-
 barorum palmas, vocali buccino
 auroram inter & Hesperum cele-
 bratum Nomen. Sed quia non satis
 est ad avitam celebritatem solius
 Patris gloria, adjungunt se Nobilis-
 simâ cerarum Antiquitate veneran-
 di maternæ Domûs Aborigines SI-

*Ludovicus
 Zielinski
 Thesaurar.
 Lomzensis,
 in Tribuna-
 li Judex
 Deputatus.*

*Tres Fra-
 tres simul
 & semel
 Nuntij.*

*Carolus, A-
 dalbertus,
 & Franci-
 scus Zielin-
 scij milites.*

Ex mater-
na Domo A-
lexius Za-
wadzki, Isa-
bella filia
Vladislai I.
in Aula
Præfectus,
postea Con-
siliarius.

Veneno ab
invidis hau-
sto redux in
Patriam
moritur.

GISMVNDI I. Regis Poloniarum
cor *Alexius Zawadzki*, à Patre Rege
ad suum *Joannem*, Regem Hungariæ
proficiscentis *Isabellæ* in comitatu
Supremus Aulæ Præfectus, post fata
Joannis Reginae Consiliarius, Aulæ
favoribus primus, honoribus non
postremus, nisi livor externi Solis
hominum perniciosior ipsis venenis
pocillator intoxicato eum tractâs-
set poculo, & suaviter propinatam
consiliorum dulcedinem, amarore
veneni compensâisset. Sed ingratum
Zoilorum facinus, quod more no-
ctuarum ad alienam caligat lucem,
& nunquam lætum, nisi letho ex-
tinctæ felicitatis, non hausit sola-
tium ex morte *Zawadzci*, qui alter
Theseus ante suum diem supremū
ossa in Patriam exportavit, indignū
ratus inter vites Pannoniæ mori,
qui totus quantus vivens Poloniæ
immortales merebatur vittas. Et
hic ardor patriæ terræ amantium
est, quòd suos ei donent cineres,
cui vitam debebant, nec patiantur
vel unâ atomo se imminui, quorum
in Pa-

in Patriam amor, quoadusq; vixerunt, fuit integer. Ingreditur paginam *Adalbertus Zawadzki*, eximius Patritij sanguinis æmulator; eò illustrior, quò majori flammâ pectoris non in solam Patriam, sed in Religionem etiam veri Numinis æstuebat. Ardentissimum in Orthodoxa vocatione tunc vel maximè se exhibuit, cùm libros hæreticorum exussit, dignus cui æternâ luce dies perennis ardeat, qui sic amore in Deum arsit, ut nullas impietatis tenebras passus fuerit. Auxit fervorem in suo munere non degener parente filius *Bartholomæus Zawadzki* *Canonicus Cracoviensis*, fidei Catholicæ assertor zelosissimus, nec non exotico Sole Orator apud SIGISMUNDVM AVGVSTVM, & STEPHANVM Reges Clarissimus. Os Principum factus linguæ immortalē accepit lauream toties melle Cecropio Orator suavissimus, quoties diversis Imperatoribus Christiani Orbis peroravit, toties fulgentissimus omnigena titulorum luce,

Adalbertus Zawadzki libros hæreticorum exurit.

Bartholomæus Zawadzki Canonicus Cracoviensis. Orator Sigismundi & Stephani Regum.

Præterea
Plocensis &
Pultoviensis.
Canonicus
in promisso
Regis mere-
tur Infulam

quoties in evidentia explicandorū
Reipublicæ arcanorum apud exter-
nas majestates laboravit; pro qui-
bus obsequijs *Plocensis & Pultovien-*
sis præter Stallum Cracoviense Ca-
nonicus, promissam à Rege STE-
PHANO meruerat Infulam, nisi
fatalis lapsus Regiæ majestatis, sta-
re promissis vetuisset. Sed etiam
meruisse Præsuleos fasces illi satis
fuit, qui virtutum suffragio capax
dignitatum omnium censebatur.
Nullus erat honor, qui *Bartholomæi*
Zawadzcyj esse non cuperet; nulla
purpura, quæ ipsius lacertis aptari
non ambiret; nullum fastigium,
quod se spontè non acclinaret ejus
pedibus; totus labor Phænicus ipsi
soli videbatur sudare velle; tota fi-
don in honorarias abire tunicas, in
quibus virtutum amplitudo specta-
bilior appareret, suumq; dec⁹ me-
rita nunquam non præmianda in-
venirent. Si Pontificias vittas in-
terrogare tunc licuisset, explicâssent
vota sua, narrâssent desideria, nec
eas puduisset ambitionē suam pro-
pala-

palare, quâ in *Bartholomæi Zawadz-*
cij merita æstuabant, illum sibi &
præcipuis in Polono Orbe Cathedris
deposcendo. Ac proindè non sup-
petebat, cur lamentis insectaretur
fortunam, quæ sibi ad infulatos ho-
nores objectu Regalis fati præpedi-
vit vestigium, quandoquidem ex
suarum electione virtutum talis es-
se censebatur, qualis requiritur ad
summa honorum fastigia. Hæc e-
nim vera & sola Nominis cellitu-
do est, in humana existimatione e-
minere, & non tam ab elevatiore
dignitatis gradu, quàm grandescen-
tibus in Patriam meritis nancisci
sublimitatem. Infundit se calamo
Joannes Zawadzki Judex Ciechanovi-
ensis, germanus *Adalberti* Frater na-
tu secundus, favore imperiali pri-
mus. Et quamvis rarò in Aulis gra-
tia confenescat, ille tamen ad latus
SIGISMUNDI AVGVSTI Regio
cordi propior gratiosissimè juventu-
te exactâ non longo postea tempo-
ris intervallo maturuit in affectu
STEPHANI Regis, quem & in ex-
H pedi-

*Joannes
Zawadzki
Judex Cie-
chanovien-*

*Contra
Mojchum
Stephano
Regi miles
absistit.*

peditione contra Moschum secut⁹,
cornu suum gentilitium vocale fe-
cit, quia hostem confecit. Vt au-
tem veram probâisset paræmiam in
decus avitum sibi crevisse cornua,
tandiu inter hostiles cuneos inso-
lescebat, quamdiu Mars ille rusti-
cus superesse potuerat. Et quia al-
ter Mithridates Moschovitico col-
luctatus draconi poto profecit sæ-

*Contra Ge-
danensium
rebellionem
Duci Zbo-
rovici ad-
iungitur.*

pè veneno, contra rebellionem Ge-
danorum cum Duce *Zborovio* expe-
ditus, ita adstrinxit effrenem eorū
licentiam, ut trahi cogeretur, ad Re-
gis obsequium, & frontem seditio-
lam deponere ad maiestatem Polo-
ni Imperij. Non minori dexterita-
te animi civilibus turmis pro Rege

*In civili
bello Sigis-
mundi Re-
gis comes
individuus.*

miles se infudit *Joannes Zawadzki*
sub SIGISMUNDO III. in armis
domesticis elanguente Polonâ Re-
publicâ. Triste illud fuit spectacu-
lum, pharsalicoq; indigni⁹ crimen
piaculo, dum foederati in mutuam
necem cruentum chalybem cives
induerent, alternoq; jugulo impri-
merent campis facin⁹, quia tamen

palu-

paludatæ amor innocentia in de-
fensionem Regis provocabat, ivit
Joannes, ut eum, quem paucis ante
diebus à Balthici maris salutatum
itinere cum lectissima Equitum Po-
lonorum assistentia hospitem inau-
guratum Sarmaticis invitavit Sce-
ptris, incolumem inter civiles mo-
tus custodiret, & cui se inter com-
munes Regni applausus humanum
præstitit, illum inter funestè ge-
mentes tubas ad cognatam armo-
rum collisionem fospitem tutare-
tur. Non transijt sine vulnere *Jo-*
anni Zawadzki cruenta illa Martis
cognati area, transijt sine mortis
periculo, quia ad majus cum Zoilo-
rum exercitu propter favores Regi-
os reservabatur certamen, quod u-
bi felicissime semper in affectu Prin-
cipis sui triumphans absolvisset,
Castellanatum Gedanensem accepit in
præmium, brevi postea *Palatinus*
Parnaviensis & Gubernator Suecensis
elicuit invidiæ lachrymas, quæ lu-
cem alienam ferre non potest. In-
felix ærugo famæ, cui solùm de-

*Castellanus
Gedanensis,
tandem Pa-
latinus Par-
naviensis &
Gubernator
Suecensis.*

Ad varios
Ducos &
Status mit-
titur inter-
pres maie-
statis.

pressæ valles alienarum calamita-
tum, & ipsa rudera collapsæ feli-
citatibus placent, nihil Joanni nocu-
it, qui contra eam virtute suâ se-
tutus, non solum in campo Mar-
tio annis quadraginta belligerans
militarem victorijs claravit capu-
lum, sed internarum etiam trium-
phator insidiarum, inoffenso pede-
mate omnem calcavit viam, sive
illa ad postes honorarios, sive ad
gloriam deducebat. Legatione fun-
ctus ad Duces *Prussiae & Curlandiae*
ita suum executus est munus, ut
mereretur à VLADISLAO IV. ad
Reginam Sueciae Palatinam Rheni
Mariam Ducissam Nivernensem,
nec non ad alios foederatos Status
mitti interpretes majestatis. Nec
mirum: vox clamantis *Joannes*, de-
buit audiri extra Polonum Orbem,
qui terram patriam complevit fama;
debuit audire *Belgium, Galliae & Bri-*
tanniae coronata Capita *Joannem*
Zawadzium perorantem, qui nun-
quam in vinculis nisi fraterni suo-
rum amoris, quantumvis nodos ipsi

tan-

tantum, & soli Macedoni resoluti-
 les non coarctata lingua penes in-
 natam Poloniae libertatem arcano
 Regum depromptos archivo in fi-
 nu Principum externorum evolve-
 ret; debuit audire, & exaudire con-
 finis Poloniae, affinis corde, foedere,
 & solo Austria, ex qua Illustrissimae
 propaginis Comitum de Szczwerin
Sophiam impetravit sibi Conjugem,
 non sola familiae Szczwerinianae
 gloria, sed etiam ternae uteri sui
 foecunditate, nimirum *Joanne, Vla-*
dislao, & Friderico filijs, Nobilissimam.
 Fructus hic fuit illi honoris, Patriae
 ornamentum, deliciae Principum. Et
 quidem *Joannes Zawadzki Succame-*
rarius Parnaviensis & Gubernator Sue-
censis ut profugam terris Astraeam
 inveniret, variam exotici Solis pe-
 regrinationem tenerior aetate susce-
 pit; redux vero in Patrios fines Ju-
 dex Deputatus in publico Regni
 Tribunali subsellium meruit, in quo
 justitiae se totum impendit sic, ut
 ne uno quidem membrorum articu-
 lo suus esse voluerit. Nuntius in

Coniugem
 accipit ex
 Illustrissima
 Comitum de
 Szczwerin
 familia Au-
 striaca.

Filios re-
 linquit Jo-
 anni tres,
 quorum unus
 Succame-
 rius Parna-
 viensis &
 Judex in
 Tribunali,
 reliqui mi-
 lites.

Comitijs nullum punctum intermi-
sit, in quo sua non eluceret dexte-
ritas.

*Vladislaus & Fridericus Za-
wadzcij* in Martem proniores ultra
Gades Herculeæ fortitudini termi-
nales victorem enssem promoverūt,
fatis sibi suffragij ad purpuram rati
hostilem sanguinem. Addunt or-

*Ludovicus
Zielinski
Pater Illu-
strissimi na-
tus ex Bar-
bara de Ful-
stin Herburi-
towna.*

namentum, quia ad Te pertinent
**ARCHIPRÆSVL ILLVSTRISSI-
ME** Herburtorum decora. Eorum
avitæ opes ex sui sanguinis prode-
untes Oceano vestræ sunt, quas Il-
lustrissim^o Pater vester, tandem Vos
hæreditate cognationis possedistis.
Jurè vobis à perenni viriditate lau-
rûs *Zielinskijs* decussati *Herburtorum*
enses obtigerunt, qui usu bellico
antiquitatem redoletis, & eam glo-
riam, quam à vestris Aboriginibus
accepistis, recentissimo charactere
in barbarorum cervicibus per inde-
fessum belli negotium renovatis.
Non fecistis jacturam magni Ante-
cessorum vestrorum Nominis, quos
olim mitratis honoribus cumulavit
Opolia, purpuris decoravit Polonia,

manu-

manubijs auxit pede hostili temerata Podolia. Vixerunt illi vobis ad exemplum, vos illis vivitis ad perennitatem; transmiserunt Nomen suum hæreditati vestræ, vos retinetis. Proindè mori nequaquam possunt, quia in vobis vivunt. Quousq; *Zielinsciorum* in memoria posteritatis vernabit Nomen, vivet *Nicolaus Herburt Castellanus Camenecensis*, vivent vitâ mutuâ in *Nicolao Zielinscij*: adjungent se connexione Sanguinis immortales *Zamoyscij*, stipabunt *Dziatynij*, circumstabunt gyrum æternitatis omni trabearum celebritate insignes *Krasinij*, assistent *Szczavinij*; Non fatigabuntur penes avitum decus Soleæ cursu æternitatis in Sago & Toga illustres *Mniewscij*, memorabiles omni ætati *Lasoccij*, purpuris & curis Reipublicæ commendati *Narzymbcij*, meritis in Patriam ornatissimi *Galemscij*, *Mostowscij* & *Kosobuccij* magna, quæ in sui reverentiam flectant olim posteritatem, Nomina; Ducent cœvum æternitati Sæculum in am-

*Nicolaus
Herburt Castellanus
Camenecensis
& alij Col-
ligati Zielinsciorum.*

plitudine fuorum Nominum patriâ
Zielinskiis obligati fasciâ & Sanguinis propinquitate *Gębiccij*; evigilabunt ad famæ buccinum gentilitij *Parifforum* Leones, *Gninsciorum* Dracones, *Szydłowsciorum* Vrfi, *Roscisesciorum* Agni; Stabunt immotis basibus avitæ *Oborsciorum* Columnæ, *Garwasciorum* Turres, *Vchansciorum* Labara; Vim nullam fatorum, temporumq; cuncta demolientium timebunt injurias æternitate gloriæ immortales *Zółkiewij*, incircumscripti famâ *Noskowscij*, obsequio Patriæ infracti *Kuczborscij*, Regum fidelitate commendati *Brzosca*, togatâ prudentiâ æstimandi *Podoscij*, armis & Infulis celeberrimi *Mdzewscij*, Tribunalium sellis fortunati *Słeszyńscij*, Regum affectibus cumulati *Grzybowski*, negotijs Reipublicæ infatigabiles *Duciminscij*, suarum prodigijs actionum admirandi *Morsztinij*, profusione sui in commune bonum inexhausti *Kęczewscij*, qui omnes augmento Sanguinis, vastissimâq; rectorum gloriâ complent æter-

nita-

nitatem, ut sciat Orbis, quanta magnitudo Nominis Tui sit ARCHIPRÆSVL ILLVSTRISIME, cui tantus Majorum exercitus ad amplitudinem cognatæ gloriæ suffragatur.

Et quamvis hæc avitæ magnitudinis ingens copia faciat plerosque inopes, qui suorum Prædecessorum claritudinem in obtentum assumunt defidiæ, contenti eo, quòd à pariete suspensas habeant Majorum imagines, vel audiant magna illorum encomia, Tu ARCHIPRÆSVL ILLVSTRISIME, novam adjecisti industriam, quâ præeuntium Tibi Antecessorum æmulareris vestigia, illasq; Gades magno passu attingeres, in quibus *non plus ultra* Aborigines Tui defixere. Ivisti per laurus Delphicas ad gloriæ Capitolium, Parnasseumque jugum ita pòeticis Novennis puer trivisti pedibus, ut merereris in campum eloquentiæ non soli ingenio, sed virtuti etiam spatiosum excurrere. Solutus hîc fuisti Ora-

Studia cum pietate tradat Illustrissim^o Archipræsul.

tor, non tamen dissolutus; ita cur-
rebas in stadio diligentiae, ut nun-
quam cespitares in probitate; in-
ter lapides offensionis lapis fuisti,
sed scintillans amore virtutis, quem
nulla unquam movere poterat im-
proborum persuasio ad lenocinia
invitantium. Si dulcedo placebat?
illam ab Attico melle delibasti; si
veris amoenitas? hanc inter folia
quaesivisti literarum; nunquam hi-
larior, quam ad fontes Rhetoricos
inter lusus verborum, sive plectra
metro canentium Poëtarum. Tota
recreatio Tua inter flores eloquen-
tiae, quas in ferta virginæ probi-
tatis, & ingenij coronamentum de-
cerpebas. Felix Cracovia! quæ non
solis Regum verticibus imponit co-
ronas, sed etiam magnis gignit her-
bam ingenijs, quam referant in tri-
umphale præmium conflictibus li-
terarijs; ter beata! quæ Tuæ Palla-
di ARCHIPRÆSVL ILLVSTRIS-
SIME fecit cunabula, quia meruit
Te Musarum delictum, Academi
Solem, jubar noctis Atticæ. Facile
præ-

*Cracovia in
Academia
primum.*

præfagâ mente vaticinari potuit
Regina illa urbium Polonarû, quia
Tu Archiântistes futurus, ejus Mu-
sæa occupabas, qui omnium capax
scientiarum, omnibus ingenio an-
testabas. Melior Tu Chironis Achil-
les vel Theopompus Isocratis, quo-
ties Tuo Præceptori Discipulus asti-
tisti, existimabant plerique Demo-
sthenem in ore Tuo, quoties fami-
liari colloquio sententiarum gravi-
tatem miscuisti; si ab exedris Scho-
lastico sublimior trunco fecisti ali-
quando verba? universorum censu-
it existimatio, pleno fluxisse alveo
fontes Rhetoricos in Tuum os, qui
ita Romanam facundiam suavi elo-
quio expressisti, ut videretur lingua
Tua loqui Tullium, & crederetur
nata esse, quæ majestates alloque-
retur. Approbavit Tui felicitatem
ingenij, & natam scientijs mentem
Ingolstadiensis Academia, quam
Pallade Cracoviensi imbutus postea
adijsti. Vidit in Te Parentum glo-
riam, gentis Polonæ decora, Patriæ
spes, augusti honoris dotes. Pro-

*Postea in
Universita-
te Ingolsta-
diensi.*

micabat vultu Tuo vasta literarum
capacitas, vigor mentis elevatae, in-
gens librorum aviditas, Nobilissim⁹
animi ignientis fervor ad omne id,
quod vel ad magnorum Parentum
solatium, vel Reipublicae desiderium
pertinebat. Nictare debuerunt In-
golstadienses noctuae, ad insolitum
Tui lumen ingenij, quod umbroso
earum Academo adeo infudisti, ut
posthac diem æternum crederent
opaca inter frondium Delphicarum
nemora. Illustrasti noctes Atticas,
cui fax mentis honestae nec non
gratissimum animi praesagientis fu-
turam lucem publicam jubar in vul-
tu radiabat. Solem Te dixisse debu-
erunt, qui & splendore avito, &
mentis clarissimâ illuminatione in
illa scientiarum Ingolstadiensium
Univerſitate praestabas alijs. Sed
Lutetia
Parisiorū. nec Parisiense Lycæum Nobilissimâ
scientiarum metropolim, Gallicae
sedem Palladis, per exoticos horo-
scopans Planeta coelos transire vo-
luisti, quin lacteam illam (siquidẽ
à lacte appellatur Lutetia) ingre-
dere-

dereris viam, fieresq; exindè ad sapientiæ fasces Candidatus, quem à Polo dicta Polonia coelo honorum destinavit. Invisisti Scholam gentium, urbanioris vitæ magistram, Regnum Scientiarum, Solem externū Sol, Urbem decoris decus, ut Gallica Joseph referres lilia, cujus virtuti coronandæ non sufficiebat Orbis Polonus. Crescere videbatur à Tuo Nomine Regni illius lætitia, quia magnis Te parabat votis prosequi *Magnum* re & nomine *Constantinum*. Expressisti ibi gentis Polonæ decorem, viditq; in Te *Zielinscio*, Censor ille morum populus florem Imperij Nostri, cui semper exoticas inter Nationes vernare licet. Ostendisti Regnantium majestatem, Senatûs gravitatem, Civium Nobilitatem, populi honestatē, facile enim ista omnia ex Te conjici potuerunt, qui omnium Polonorum ideam vultu & animo præferebas. Placebas omnibus, & nullus fuit, qui Tui suavitate vultûs recreari non contenderet, revereri

Theologiam
Romæ audit

modestiam non gestiret, admirari ingenium non ambiret. Si quærere voluisses, invenisses plurimos, qui Tuum vultum Apelleis mandabant coloribus, & per vicinos portabāt lares, ut neminem vel simulacrum magnæ Tuæ indolis latuisset. Hoc tantum reatu in illam gentem deliquisti, quia Romam petiturus, exacto vix biennio, Gallias reliquisti. Facilem tamen veniam excessus illius indulgit Tibi *Vaticanus*, quem de Deo scientias auditurus, accessisti. Meritorius hic fuit actus Tuus, quia non sine laurea doctorali utriusq; Juris Tibi transijt. Solam existimationem ab exotico Orbe multi referunt, & emptos duntaxat titulos devehunt in Patriam; Tu laureâ coronatum caput, quia non vacuum sacrâ Pallade fuit, exportâsti, ut documentum Polonus Orbis caperet, non caluisse tantum Te peregrino Sole, sed etiam claruisse. Reviruit in Te spes Ecclesiæ, dum præmiales has sacri laboris vittas mereris *Zielinscius*, nec importunè La-

tij septem colles surrexerunt, fati-
dicum aliquid lymphis infusurran-
te sibi Tiberi, quandoquidem in
Urbe Orbe majori palmam ingenij
accepisti, ubi nullus, nisi magnus,
sui æstimationem nanciscitur. De-
dit judicium de Te caput Orbis u-
niversum Roma, quòd non solùm in
vertice septicolli, sed etiam in pla-
no Poloniæ augustam honoris ele-
vationem merearis. Sicut defacto
habuit pond⁹, Oenotrium illud suf-
fragium in Polono Orbe, vix enim
auctior disciplinis in Patriam re-
measti, illicò ad latus Regium MI-
CHAELIS I. & fama publica ver-
fatissimi apud externos ingenij, &
rara indoles Te promovit. Suspexit
Korybuteum fidus æstimatam ab
exteris, & ipsis dotatam naturæ ta-
lentis indolem, sed non diu. Cri-
ticus fatorum vesper umbris Kory-
buteam involvit Cynthiam, à qua
Tu post noctes Atticas splendorem
hauriebas. Sic ubi lucere desiit, Te
moestissimum inter Cupressus Regis,
& lugentes communem sui orbita-

*Ex Italia
redux ad
latus Regi-
um Micha-
elis I. assu-
mitur.*

*Post fata
Michæelis
Regis ad
latius Joann-
is III.*

tem Patriæ Cives, dereliquit. Non diu tamen hic pullus tenuit Cives pupillos dolor, quia intra paucos menses felicissimâ inauguratione JOANNIS III. ex cordibus universorum exulare debuit. Quare depulsis vultu lachrymis novâ majestatis luce fruiturus, sub Serenissimum gentilitij obtentum Clypei perrexisti. Et hîc Tuus Regiarum majestatum cultus invenit gratiam. Appretiavit ingenium Tuum, non magis lumine scientiarum, quàm virtutum claritate conspicuum, Salomon ille Polon⁹, ideò statim meritos cæpit parare fasces, ut non ipsius tantum vertex Regius, sed Tua etiam coronaretur indoles. Prima hæc ejus, inter alias Regni, cogitatio fuit, ut Te super candelabrum Ecclesiæ lumen, non postremo elevaret honore. Proindè quoties Te Regio dignabatur oculo, sudum frontis claritati fascium præmittebat; quoties loquebatur, linguam honoris cogitatione prævertebat; quoties meditabatur, mentem præ-

vio dignitatis Tuæ anteibat deside-
rio, ita ut Tu unus videreris caput
Regium magnarum sedem cogitati-
onum occupâsse, & ille nihil medi-
tari nisi Tuum honorem. Vbi ta-
men stationem illi defigeret, præ-
ter Cathedralem Vladislaviensem
Præposituram, quæ nihilominus E-
piscopos semper educabat, non in-
venit. Fatumnè illud, an Regnato-
ris fuit industria? pro Tuo utrum-
que honore: Suffecerat enim Tibi
scivisse viam, quâ pergitur ad infu-
lato fasces. Rarò festiva sunt, quæ
festina, & vix aliqua in sublunari
mundo reperitur celebritas, quam
parit celeritas. Vile Serpyllum, &
ignavum herbarum vulgus urticæ,
ad breve tempus durant, quia uni-
us veris pignora; Jovi dilecta quer-
cus sæcularem transcendit canitiẽ,
quia juventam diù fovet. Paulatim
scilicet summa petuntur, nam nihil
subitum, quod non sit subditum vi-
litati. Archipræfuleos Tibi parabat
fortuna murices, secundos post Re-
gnatorem Poloniarum gradus fabri-

*Vladislavi-
ensis Præ-
positus à Re-
ge creatur.*

Duorum E-
piscopatum
simul & se-
mel Admi-
nistratores.

cabat, in quib⁹ solidior ut stetisses,
à Vladislaviensi Præpositura lentum
callem præsignavit. Ita nihilomi-
nùs Te illis donavit fascibus, alter
ut remex vada minoribus lembis
prætentares, antequam ingredere-
ris Oceanum. Parvus ille, sed ma-
gnis prælufit honoribus, quos obi-
bas pedentim, antequam perveni-
res ad summum. Duorum vacanti-
um Episcopatum, Vladislaviensis
videlicet & Plocensis, simul & se-
mel administratio probavit Te Atlā-
tem, qualisq^{ue} eras futurus Hercules,
demonstravit. Binum portāsti O-
lympum non sine semente gloriæ,
cui & *Vomeres Madalinij* culturam
præmiserunt, & *Dabscia* cultum
Arbor, quæ dum lapsu fatali in ro-
gum Libitinæ cessit, Tibi de publi-
ca luce non parùm accessit. Incla-
ruisti rarâ administrationis pruden-
tiâ, quia illam Provinciam, quæ du-
obus egebat Capitibus, Tu unus ab-
solvisti. Pingvia satis pascua grex
Christi relictus invenit in Te *Zie-
linscio*, qui ex Tuis passionibus mul-

tas herbas triumphales tulisti, in
omnibus moderatus, exemplaris,
sanctus. Et hæc virtutum claritu-
do, ultiores honoris umbras evo-
cavit. Ivisti Ablegatus ad Comitia
Generalia Mariæburgensia, eâdem
claritate sermonis, quâ virtutum
conspicuus. Non egebat Aristopha-
nis lychno, evidentiam cogniturus
arcanæ mentis Regiæ coetus ille
Nobilitatis, cui Tu linguâ inter-
nuntiâ, adeò illam demonstrâsti, ut
Sole clarior videretur. Et quid mi-
rum, quòd corda omnium in Regis
sententiam pellexisti? qui suavem
ore Hymettum, Cecropiasq; Hyblas
prætulisti. Traxit univerforum lin-
guas, in consensum propositi Regij,
Tuorum dulcedo verborum, quæ,
& gratiam JOANNIS III., &
candorem liliati Nominis in Jose-
pho, redolebat. Hinc gemina illa
ad Tribunal Regni Deputatio Her-
culem Te invenit Gallicum, qui ca-
tenâ verborum delinquentes reos
ligares, innocentiam Tibi obligares.
Schinotenes omnes arbitrabatur

*Ad Comitia
Mariabur-
gensia Ab-
legatus.*

*Ad Tribu-
nal Judex
Deputatus.*

scelus, quoties contra illud à decretoria sella detonuisti, & nunquã se majoribus circumventam angustijs nequitia reputabat, quã ubi inquisitoriã utereris circuitione. Vltimam egisse periodum sibi videbatur improbitas, dum ad puncta recurreres. Et hic judiciarius rigor sæpiùs flexit sacram Themidem in reverentiam *Tui Aviti Capitis*, quod talem sibi progeneraret Palladem, quæ pro se armata staret. At in illo Tribunali, neqve Tu ARCHIPRÆSVL ILLVSTRISSE evasisti sententiam: decretum Tua tulere merita, ut infulatum portares caput. Quis tunc rubor Tuus? murex collatus indicabat. Neq; enim Tu verecundari poteras, qui purpuris nihil indignum egisti. Et ejusmodi innocentes amat Honor. Pulchrè ornatur titulis, quem non deformant vitia. Aliàs monstrum tæniatum est, flagitium honoratum. Procul à Te hæc portenta, qui Gnefnensibus lilijs admiscebaris *Zielin-scus*. Vitâ integer, Præsuleas initiasti

Suffraganeus Gnefnensis creatus.

âsti vittas, ut merereris *Agno* im-
 maculato *Radziejovij* fociari, qui pa-
 scitur inter lilia. Pontificia hæc
 virtus est; *oportet enim Episcopum si-
 nè crimine esse, sicut DEI dispensato-
 rem.* Labores Tuos non vocamus
 in paginam, quia timemus, nè suc-
 cumbat. Satis tamen habent præ-
 conij, quòd recentes vivant in lin-
 guis Ecclesiæ Loviciensis, & totius
 Metropolitanæ Diœcesis. Quot-
 quot sacris admovisti Aris, tot feci-
 sti Oratores, qui Tuis laudibus ora-
 victimant; quotquot tractus, per vi-
 arum incommoda, muneri satisfac-
 turus Præsuleo, circumivisti, tot
 reliquisti tractatus Tuorum encomi-
 orum; insuper hanc universis neces-
 sitatem imposuisti, quòd bene loqui
 de Te nunquam non possint, cogi-
 tare nunquam non desiderent. Hanc
 eandem nunc imponis necessitatem
 ambulatorijs nostrum omnium vo-
 luntatibus ARCHIPRÆSVL IL-
 LVSTRISIME, quòd non linguis
 tantum & desiderijs, sed etiam cor-
 dibus Te sequamur ad Archicathe-
 N dram

*Archiepi-
 scopus Leo-
 polienfis.*

dram Leopoliensem. Imus votivis
onuisti affectibus, qui Tui sum⁹ obli-
gatione: comitamur pennatis ac-
clamationibus è nido Gnesnensis
Diœcesis pulli: provolamus in ap-
plausum præpete Loviciensî Pelica-
no, ut non solus Apollo inter cœtus
Deorum albo provehatur Olore,
sed etiam Tua fortuna ad præfixum
Honori culmen. Nostrorum comi-
tatu votorum ingredi Theatrum
illud, quod Tibi pridem Tua fabri-
cabat virtus. Illucesce Russo clima-
ti fidus, magnæ felicitatis prænun-
tium. Explica purpuram, cujus ni-
tore sacro, mentes omnium fere-
nentur. Prospicit erectus avidita-
te ingressus Tui Leoninus collis, ex-
pectant gregis tædia, ultra sene-
ctam Nestoris fortunatus pulchri-
tudine gloriæ Tuæ & honoris pur-
purati intende, prosperè pro-
cede, & regna.

Bibl. Jag.

